

鞏昌府志

酉



鞏昌府志卷之二十四

人物上

傳人物所以錄鄉賢也夫戴圓履方熙熙攘攘孰非人者元化無形寄其形於天地以資化育天地無心寄其心於人以資經緯茲三才所由列也人易言哉太上聖人若羲皇繼天立極開萬古之群蒙軒帝開物成務啓百王之禮樂此聖人也然鍾毓有自誕降有所即欲不謂鞏郡之人物不可矣其次為賢人出有所為奉天職養夫民以安群生

鞏昌府志

卷二十四

處有所益惇天倫明天道以範鄉邦苟非其人不可以勢力干誠有某人不敢以側陋遺化誨雖由政教警戒實賴鄉評然猶有耻人言而不恤者以狼貪黷貨以虎冠凌人與鴟蛄俱生與蜂蟻俱死名雖為人實不得謂之人矣人孰無心可無自愛乎哉

上古

太昊伏羲氏一曰庖犧氏風姓代燧人氏繼天而王毋履大人跡而生庖犧於成紀有聖德仰觀象於



天俯觀法於地旁觀鳥獸之文與地之宜近取諸  
身遠取諸物始畫八卦以通神明之德以類萬物  
之情造書契以代結繩之政於是始制嫁娶以儷  
皮爲禮作網罟教民畋漁取犧牲以充庖厨故曰  
庖犧氏有龍瑞以龍紀官號曰龍師木德王主春  
令故易稱帝出乎震月令孟春其帝太皞是也都  
於陳其後裔當春秋時有任宿須句顓臾皆風姓  
之胤也

黃帝有熊氏姬姓曰軒轅有熊國君少典之子姚瞻

曰生於天水帝生而神靈弱而能言幼而徇齊長  
而敦敏成而聰明炎帝既沒子孫世衰蚩尤始作  
亂黃帝乃治五兵以征之與蚩尤戰於涿鹿之野  
擒而殺之諸侯皆尊軒轅爲天子代神農氏是爲  
黃帝以民生有欲衣食雖備苟無禮義則強凌弱  
衆暴寡智欺愚勇苦怯於是始制軒冕垂衣裳貴  
有常尊賤有等威使上下有序各安其分而天下  
大治作舟楫以濟不通服牛乘馬引重致遠正名  
百物天下有不順者征之不平者去之邑於涿鹿

之阿遷徙往來未嘗寧居在位百年而後崩年百  
十歲有廿五子其得姓者十四人爲十二姓姬西  
祁已滕箴任荀僖媯儗依

周

秦祖字子南成紀人孔子弟子唐封少梁伯宋封鄆  
城侯明稱先賢從祀孔子廟庭

壤駟赤字子徒成紀人孔子弟子篤信守道爲曾子  
之亞唐封北徽伯宋封上邽侯明稱先賢從祀孔  
子廟庭

鞏昌府志

卷二四

三

石作蜀字子明成紀人孔子弟子從刪述受詩書多  
所啓予唐封石邑伯宋封成紀侯明稱先賢從祀  
孔子廟庭

漢

紀信成紀人項羽圍漢祖於滎陽甚急信請誑楚乃  
乘王車出東門曰食盡漢王出降楚王及麾下皆  
之城東觀漢王乃得出西門去羽燒殺信

李廣仲翔孫世受射文帝初廣以良家子從軍射殺  
羗甚多爲中郎武騎常侍數從獵格殺猛獸帝曰

惜廣不逢時如令當高祖世萬戶侯豈是道哉景  
帝初爲隴西都尉徙騎郎將吳楚反爲驍騎都尉  
從太尉亞夫戰昌邑下顯名徙上谷太守數與漠  
北戰公孫昆邪爲上言曰廣材氣天下亡雙自負  
其能數與敵确恐失之乃徙廣上罷太守後徙隴  
西北地雁門代都雲中太守皆以力戰爲名後從  
大軍出塞失道恥對簿自到百姓聞之知與不知  
皆爲垂泣詳見本傳

李蔡廣從弟蔡與廣俱爲郎事文帝景帝時蔡積功

至二千石與廣皆爲武騎常侍武帝時蔡至代相  
元朔初拜輕車將軍與衛建等從大將軍青擊右  
賢王得右賢裨王衆男女畜數千百萬青爲大將  
軍詔都尉敖等皆爲侯再從大將軍獲捷以千六  
百戶封蔡爲樂安侯元狩初代公孫弘爲丞相蔡  
品下中名聲出廣下甚遠然廣不得爵邑而蔡爲  
列侯

李敢廣仲子初漠北四萬騎圍廣廣使敢往馳之直  
貫敵壘告敵易與軍士乃安廣三子當戶椒敢爲

卽天子與韓嫣戲嫣少不遜當戶擊嫣嫣走天子以爲勇椒爲代郡太守皆先廣死廣自到時敢從驃騎將軍明年敢以校尉從驃騎將軍擊左賢王力戰奪左賢王鼓旗斬首多賜爵關內侯食邑二百戶代廣爲卽中令怨大將軍青之傾其父乃擊傷大將軍大將軍匿諱之居無何敢從上雍至甘泉宮獵驃騎將軍去病與青有親射殺敢去病時方貴幸上諱云鹿觸殺之

趙充國字翁孫隴西上邽人始爲騎士以六郡良家

子善騎射補羽林爲人沉勇有大畧少好將帥之節而學兵法武帝時以假司馬從貳師將軍擊漢北爲敵所圍漢軍乏食數日死傷者多充國廼與壯士百餘人潰圍陷陳貳師引兵隨之遂得解身被廿餘創貳師奏狀詔徵充國詣行在所武帝親見視其創嗟歎之拜爲中郎遷車騎將軍長史昭帝時武罷氐人反充國以大將軍護軍都尉將兵擊平之遷中郎將屯上谷還爲水衡都尉擊獲祁西王擢爲將軍與大將軍霍光定策立宣帝封營

平侯後爲蒲類將軍征西羌屢建奇功進後將軍  
元康初先零與羌背畔犯塞殺長史充國年七十  
餘上老之使御史大夫丙吉問誰可將者充國對  
曰無踰於老臣者矣上遣問焉充國曰兵難遙度  
臣願馳至金城圖上方畧願陛下以屬老臣勿以  
爲憂充國至金城遠斥埃行必爲戰備止必堅營  
壁屯能持重愛士卒先計而後戰得謀者遣歸計  
欲以威信招降罕开及刼略者時上已發材官騎  
士羌騎合六萬人酒泉太守辛武賢奏欲速進戰

天子下其書充國以爲武賢欲輕引萬騎分爲兩  
道出張掖回遠千里敵即據前險守後阨以絕糧  
道必有傷危爲羌衆笑千載不可復而武賢以爲  
可奪其畜產獲其妻子此殆空言非至計也臣愚  
欲捐罕开之過先行先零之誅以震動之使悔過  
因赦其罪擇良吏知其俗者拊循和輯此全服之  
策天子下其書公卿議者半不然往復數四以死  
守之遂上屯田三奏充國奏每上輒下公卿議初  
是充國計者什三中什五最後什八有詔詰前言

不便者皆頓首服及羗斬楊玉首充國振旅而還置金城屬國以處之上罷遣辛武賢歸酒泉充國復爲後將軍衛尉充國乞骸骨賜安車駟馬黃金六十餉罷就第年八十六薨謚曰壯侯

廉褒襄武人在河西以恩信結羗戎羗戎感之班氏曰秦漢以來山東出相山西出將漢興成紀李廣李蔡上邽趙充國襄武廉褒狄道辛武賢慶忌皆以勇武顯聞此可稱列者也其餘不可勝數

段會宗字子松天水上邽人竟寧中以杜陵令舉爲

西域都護騎都尉西域敬其威信三歲拜沛郡太守徙雁門太守數年坐法免西域諸國上書願得會宗陽朔中復爲都護會宗爲人好大節矜功名與谷永相友善谷永閱其老復遠出予書戒會宗會宗既出諸國遣子弟郊迎小昆彌前爲會宗所立德之歲餘小昆彌爲國民所殺諸翎侯大亂徵會宗左曹中郎將光祿大夫使安輯烏孫立小昆彌兄末振將定其國而還明年末振將殺大昆彌會病死復遣會宗發戍已校尉請回兵即謀末振



將太子番丘會宗恐大兵入烏孫驚番丘亡逃於所發兵選精兵三十弩徑至昆彌召番丘責以未振將骨肉相殺殺漢公主子孫受詔誅番丘即手劔擊殺番丘還奏事公卿議會宗權得便宜以輕兵深入烏孫即誅番丘宣明國威宜加重賞天子賜會宗爵關內侯黃金百觔明年會宗病死烏孫中年七十五城郭諸國爲發喪立祠焉

秦嘉字士會渭城人博學宏才爲郡上計掾

### 三國

鞏昌府志

卷二四

八

姜維字伯約天水冀人少孤與母居郡辟爲上計掾進州從事以父郡功曹罔沒於戰場准官中郎參本郡軍事建興初諸葛孔明軍向祁山天水太守適出循行維及功曹主簿從太守聞蜀兵至諸縣響應疑維等皆有異心夜亡保上邽維等追至上邽不納還至冀亦不納維等乃俱詣亮亮署維倉曹掾奉義將軍與參軍蔣琬書曰姜伯約忠勤時事思慮精密涼州上士也此人心存漢室而才兼於人俾教軍事當遣見主上遷中監軍征西將軍

及亮卒進右監軍輔漢將軍封平襄侯延熙初大將軍蔣琬遷大司馬以維爲司馬數帥偏軍西入景遷鎮西大將軍與大將軍費禕共錄尚書事維自以練西方風俗兼負其才武欲誘諸羌以爲羽翼謂自隴以西可斷而有也每欲大舉禕常裁制之禕卒維帥數萬人攻南安狄道輒勝又破洮西遷大將軍後爲魏將鄧艾破於段谷衆庶由是怨讟而隴西亦騷動矣貶維後將軍又帥兵出漢中爲父所設還住沓中維本羈旅托國累年攻戰功績不立既保劍閣以拒鍾會會不能克而鄧艾却自陰平由斜谷入蜀維聞之懼於是引軍由廣漢以覘虛實尋被後主令乃投戈放仗詣會會厚待維權還其印節會構鄧艾因將維詣成都以叛欲授維兵爲前驅魏將士憤發殺會及維

晉

李暉字玄盛隴西成紀人家素昌世爲西州右姓父昶幼有令名早卒遺腹生玄盛少好學沉敏寬和美器度涉通經史尤善文義及長頗習武藝誦孫

吳兵法呂光末段業自稱涼州牧署玄盛效穀令  
燉煌護軍郭謙等以玄盛溫毅有惠政推爲寧朔  
將軍燉煌大守移檄六郡推玄盛爲大都督大將  
軍涼公秦涼二州牧護羌校尉玄盛乃赦其境內  
建年爲廣平遣宋繇擊玉門以西諸城皆下之遂  
屯玉門陽關廣田積穀爲東伐之資於南門外臨  
水起堂名曰靖恭堂以議朝政又立泮宮增高門  
學生五百人起嘉納堂於後園以圖讚所志義熙  
初玄盛改元爲建初遣使間行奉表詣闕有涼人

輒依實融故事迫臣以義上臣以都督大將軍涼  
公州牧之號今帝居未復諸夏分裂臣所以即心  
絕氣志寢與食彫肝焦慮不遑寧息者也西涼雖  
遼義誠密邇臣雖名未結於天臺然憑賴累祖寵  
光不敢辭以稽大務輒順群議亡身即事輟弱任  
重懼忝威命昔在春秋諸侯宗周國皆稱元以布  
時令今天臺邈遠正朔未加發號施令無以紀數  
輒年冠建初與伏寵靈全制一方使義誠著於所  
天殉命灰身隕越慷慨後遷居於酒泉又以前表

未報復遣使間行奉表曰江山悠隔朝宗無階延  
首西極翹企遐方吳涼懸邈蜂萬羣充衢方珍貢使  
無由展御今資儲已足器械已充冀憑國威席卷  
河隴揚旌秦川承望詔旨盡節竭誠隕越爲效立  
盛既遷酒泉乃敦勸稼穡年穀頻登百姓樂業立  
盛以緯世之量當呂世之末爲群雄所奉遂啓霸  
圖兵無血刃坐定千里人謂李氏之業長矣以後  
河西諸李自籍張掖鞏志不記其歸籍天水者收  
之

晉既東隴右鞠爲僭亂之場劉曜據歷城稱趙  
石虎據隴上稱後趙乞伏據苑川弋仲起赤亭  
赫連據抱罕念生薛舉各有稱號上邽武都隴  
城之間人無定主賢人隱矣故無可紀魏隋之  
際稍有出者則無如李氏之先故特紀之

### 西魏

李虎天賜子官至大尉與名公李弼等八大將軍伐  
魏有功皆賜爲柱國號八柱國周閔受傳追錄其  
功封唐國公謚曰襄

李昫虎子也襲唐公隋安州總管柱國人將軍謚曰  
仁生高祖於始平實開有唐三百載之帝業其籍  
始自冀城

唐

李白字太白隴西人隋末多難徙家西域後還南安  
復客廣漢流離散落隱匿姓名父遂以客爲名高  
卧不仕初白之生也父指天枝以復姓毋夢長庚  
而告祥十歲通詩書既長隱岷山州舉有道不應  
益州長史蘇頲一見異之曰是子天才英特少益

以學可比相如故瑋奇宏廓拔俗無類常欲一鳴  
驚人一飛冲天由是慷慨自負不拘常調器度弘  
大聲聞於世然少任俠喜縱橫好擊劍及客任城  
與孔巢父韓準裴政張叔明陶沔居徂徠山號竹  
溪六逸天寶初至長安賀知章見其文歎曰子謫  
仙人也言於玄宗召見金鑾殿上降輦步迎論當  
世務草荅番書辯如懸河玄宗嘉之以寶牀方文  
賜食御前親爲調羹詔供奉翰林他日泛白蓮池  
公不在宴帝歡既洽召公作序時公已被酒於翰

苑命高力士扶以登舟亦嘗侍帝醉使高力士脫  
鞞力士摘其詩以激貴妃譖之與賀知章李適之  
王璵崔宗之蘇晉張旭焦遂爲酒中八仙人既而  
上疏請還舊山玄宗許之公以爲千鈞之弩一發  
不中則當摧撞折牙而永息機用安能效碌碌者  
蘇而復上哉晚坐誑誤流夜卽放還渡牛渚至姑  
熟悅青山有終焉之志盤桓放歌竟卒代宗初搜  
羅俊逸拜左拾遺制徒下於玄壤一子出遊二女  
皆嫁編昨然太白父客自秦踰岷客蜀之彰明白

實生焉而成紀故宅之井猶存古今稱太白井隴  
西仁壽山有墓

李揆字端卿成紀人僑寓滎陽祖玄道爲文學館學  
士父成裕爲秘書監揆性警敏善文章開元末擢  
進士第補陳留尉獻書闕下試中書遷右拾遺再  
轉起居卽以考功卽中知制誥拜中書舍人乾元  
初有議上皇后號曰翊聖者肅宗問揆對曰前代  
后妃終則有謚景龍之號禮之所非今陛下動遵  
典禮奈何踵其亂哉帝驚曰幾誤我家事遂止後

帝欲建儲以揆一言而決俄兼禮部侍郎揆病取  
士不考實乃陳書廷中進諸儒約曰上選士務得  
才可盡所欲言由是人人稱美未卒事拜中書侍  
郎同中書門下平章事修國史封姑臧縣伯揆美  
丰儀善奏對帝歎曰卿門第人物文學皆當世第  
一信朝廷羽儀乎故時稱三絕以忤旨出爲歙州  
刺史累年始拜睦州入爲國子祭酒禮部尚書盧  
杞素惡揆用爲入番會盟使拜尚書左僕射揆不  
敢辭揆至番群問曰聞唐有第一人李揆公是否  
鞞昌府志

卷二四

十四

揆荅曰彼李揆安肯來耶使還道卒年七十四贈  
司空謚曰恭

李晟字良器舊洮州臨潭人世以武力仕晟幼孤奉  
母身長六尺年十八從王忠嗣擊吐番悍首突陣  
殺傷甚衆晟挾一矢殪之三軍譙奮忠嗣曰萬人  
敵也鳳翔節度使高昇召署列將擊疊州叛羗於  
高當川又擊連狂羗於罕山破之廣德初擊党項  
有功授特進試閤門使建中初魏博田悅反晟將  
神策先鋒斬楊朝光乘冰度洛水破悅又戰洹水

悅大敗加檢校左散騎常侍會帝幸奉天召晟即日治嚴迎拜神策行營節度使進臨渭北所過樵蘇無犯朔方帥李懷光遷延有異志不欲晟當一面計欲晟自削其軍餉俾士怨易撓晟顯折其謀懷光知計塞乃止圖反益急晟慮爲懷光所制適有召使到晟軍晟爲之下令曰有詔徙屯即結陣趨東渭橋帝狩梁州顧渾瑊曰渭橋在賊腹中兵旅援絕晟能辦勝邪瑊曰晟秉義挺忠毅然不可奪臣策之必破賊帝乃安遣晟併總勤王兵詔進

晟尚書左僕射同中書門下平章事晟受命拜且泣曰京師天下根本若皆執羈勒誰將復之乃繕甲兵治陣湟以圖收復時晟提孤軍橫當寇鋒恐二盜合以軋之卑詞厚幣僞致誠於懷光新命下於是駱元光守潼關尚可孤保七盤皆受晟節度戴休顏舉奉天韓游瓌悉從晟懷光始懼晟乃移書顯讓之使破賊自贖不聽畏爲晟襲乃奔河中其下孟涉改威勇以兵數千自叛歸晟皆表以要官帝遣使間道詔晟兼河中等節度使又節度京



畿加招討使帝欲益西幸晟請駐梁漢以繫天下  
望又進兵馬副元帥時晟家皆爲賊質晟皆不顧  
日以忠誼感發士卒士心終無攜怨邏得謀者敕  
曰爲我謝令言等善爲賊守勿不忠於賊乃引兵  
叩都門賊不敢出明日會諸將圖所向衆對曰先  
拔外城後清宮晟曰外城有里閘之隘若設伏格  
戰居人囂潰非計也賊重兵精甲聚苑中今直擊  
之是披其心腹將圖走不暇諸將曰善乃自東渭  
橋移壁光泰門遂克都城人不知王師之入也明

日晟屯安國寺斬賊用事者及臣賊宦豎於市表  
著節不屈者擇文武攝臺省官以俟乘輿露布至  
梁帝感泣曰天生晟爲社稷豈爲朕哉拜晟司徒  
兼中書令帝至自梁晟以戎服見三橋帝駐馬勞  
之晟再拜頓首賀克殄大盜廟朝安復已即跪陳  
义留天誅之罪伏道左不起帝爲掩涕命給事中  
齊映起之使就位詔將相送之帝紀其功自文於  
碑敕皇太子書立於東渭橋乃拜晟鳳翔隴右涇  
原節度使兼行營副元帥貞元三年帝坐宣政殿

引見晟備冊禮進拜太尉中書令封西平郡王罷  
其兵帝嘉其勲下詔褒揚令圖其象於舊臣之次  
命皇太子書其文以賜晟晟刻石於門晟自元帥  
徙王西平郡薨年六十七帝聞流涕手詔誓以存  
保世嗣贈太師謚忠武憲宗元和中詔以晟饗德  
宗廟庭有十五子其聞者惟憲愬最賢世其家  
權德輿字載之皋之子也七歲居父喪哭踊如成人  
未冠以文章稱諸儒間韓洄黜陟河南辟置幕府  
徙江西觀察府判官德宗聞其材召爲太常博士

改左補闕貞元間關東淮南浙西大水載之上言  
天下大計仰於東南宜使持節出賑問所疾苦德  
宗納之裴延齡以巧倖進判度支載之上疏斥言  
邦國之務不宜委非其人不省遷起居舍人兼知  
制誥中書舍人時朝廷重除拜載之獨直兩省乃  
上書言要重之司不宜代攝詔曰非不知卿之勞  
但擇如卿者未得其人耳久之知禮部貢舉直拜  
侍郎知三歲甄品詳諦所得士相繼爲公卿宰相  
取明經初不限員時大旱載之因陳闕政朝廷頗

採用之元和初歷兵部侍郎自太常卿拜禮部尚書同中書門下平章事王諤入朝求兼宰相載之以爲開後人要求之門不可朝廷乃止出爲山南西道節度使後二年以病乞還卒於道年六十贈尚書左僕射謚曰文德輿論辨漢所以亡西京以張禹東京以胡廣文雅正贍縵有補於世雖動止無外飾其醜藉風流自然可慕貞元元和間爲縉紳羽儀韓文公爲之碑

李益字君虞故宰相揆族子也辟地姪臧大曆四年

鞏昌府志

卷二四

六

登第二十三受末秩從事十八載多在兵間於詩尤所長貞元末與宗人賀齊名每一篇成樂工爭賂求之以備歌聲供奉天子至征人早行篇天下皆施之圖繪游燕劉濟辟置幕府進爲營田副使憲宗雅知名召爲秘書少監集賢殿學士自負才凌藉士衆衆不能堪諫官言益在幽州時詩多怨望語降秩俄復舊官累遷右散騎常侍大和初以禮部尚書致仕

李翱字習之隴西人中進士第始調校書郎元和初

爲國子博士史館修撰嘗謂史官紀事不得實乃  
上言人之行非大善大惡人不周知故取行狀然  
其狀皆故吏門生苟言虛美溺於文而忘其理請  
指事載功則賢不肖易見詔可又條與復太平大  
略再遷考功員外郎後除朗州刺史久之召爲禮  
部郎中翱性峭鯁議論無所屈仕不得顯官怫鬱  
無所發見宰相李逢吉面斥其過失逢吉詭不校  
翱志懼即移病滿百日有司白免官逢吉更表爲  
廬州刺史時州旱民無食權豪賤市田屋牟厚利  
鞏昌府志

而窶戶仍輸賦翱下令使以田占租無得隱收豪  
室稅萬二千緡貧弱以安入爲諫議大夫知制誥  
中書舍人又左遷少府少監出爲湖南觀察使山  
東道節度使卒翱始從昌黎韓愈爲文章辭致渾  
厚見推當時故亦謚曰文

李賀字長吉每自署曰隴西李賀七歲能辭章韓愈  
皇甫湜始聞未信過其家使賀賦詩援筆輒就如  
素構自目曰高軒過二子大驚自是有名於人  
瘦通眉長指爪能疾書每旦日出騎弱馬從小奚

奴背古錦囊遇所得書投囊中未始先立題然後  
爲詩如它人牽合程課者及暮歸足成之非大醉  
吊喪日率如此過亦不甚省母使婢探囊中見所  
書多即怒曰是兒當嘔出心乃已耳以父名晉肅  
不肯舉進士愈爲作諱辨然卒亦不就舉辭尚奇  
詭所得皆驚邁絕去翰墨畦逕當時無能效者樂  
府數十篇雲韶諸工皆合之絃管爲協律卽卒年  
廿七

李愬字元直晟次子也有籌略善騎射以蔭補協律

鞏昌府志卷二四

二十

卽累遷衛尉少卿出爲房晉二州刺史以治行異  
等加金紫光祿大夫憲宗討吳元濟節度使高霞  
寓旣敗袁滋復無功愬求自試遂拜檢校左散騎  
常侍兼唐鄧節度使愬以其軍初傷挫乃命曰天  
子知愬能忍耻故委以撫養戰非吾事也衆信而  
安之蔡人旣敗辱霞寓等又愬非夙所畏易之不  
爲備愬務推誠待士賊來降輒聽其便衆願爲愬  
死故能悉知山川險易及賊情僞旣知士可用乃  
請濟師於是縶鎧厲兵攻馬鞍山柵戰破呀山以

取鑑冶城入汶港柵拔楚襲朗山再執守將平青  
陵城擒賊將丁士良異其才不殺署爲將士良謝  
曰吳秀琳不可破者陳光洽爲之謀也我能爲公  
取之乃擒以獻於是秀琳舉文城柵降遂以其衆  
攻吳房衆決死戰射殺其將賊乃走或勸遂取吳  
房愬曰不可不若留之以分其力初秀琳降愬單  
騎抵柵下與語親釋縛署以爲將秀琳爲愬策曰  
必破賊非李祐無與成功者祐賊健將也愬候祐  
護獲於野遣史用誠以壯騎三百人伏其旁擒而

還諸將素苦祐請殺之愬不聽以爲客待益厚迫  
於衆怒械而送之朝表言必殺祐無與共誅蔡者  
詔釋以還愬愬乃令佩刀出入帳下署六院兵馬  
使六院者隋唐皆山南竒才銳士故以委祐祐捧  
檄嗚咽諸將乃不敢言由是始定襲蔡之謀舊令  
敢合謀者族愬刊其令一切撫之故謀者反效以  
情愬益悉賊虛實時李光顏戰數勝元濟悉銳卒  
屯泗曲以抗光顏愬知隙可乘乃遣從事鄭澥見  
裴度告師期祐以突將三千爲前鋒李忠義副之

愬率中軍三千田進誠以下軍殿令曰引而東六  
十里止襲張柴殲其戍令士少休益治鞍鎧發刀  
發弓會大雪天晦風凜偃旗裂膚張柴東陂澤險  
阻衆未嘗蹈也皆謂投不測始發吏請所向愬曰  
入蔡州取吳元濟士失色監軍使者泣曰果落祐  
計然業從愬人人不敢自爲計愬道分輕兵斷橋  
以絕洄曲道又以兵絕朗山道行七十里夜半至  
懸瓠城雪甚城旁皆驚鶩池愬令擊之以亂軍聲  
賊恃吳房朗山茂晏然無知祐等扒墉先登衆從

之殺門者發闕留持柝傳夜自如黎明雪止愬入  
駐元濟外宅蔡人驚曰城陷矣元濟尚不信及聞  
號令曰常侍傳語始驚曰何常侍得至率左右登  
牙城田進誠兵薄之愬計元濟且望救於董重質  
乃訪其家慰安之使無怖以書召重質重質以單  
騎白衣降愬待以禮進誠火南門元濟梯而下檻  
送京師申光諸屯尚二萬衆皆降愬不戮一人其  
爲賊執事帳內厨廐厮役悉用其舊使不疑乃屯  
兵鞠場以俟裴度至愬以素鞵見度將避之愬曰

此方廢上下分久矣請因示之蔡人聳觀乃還也  
文城柵有詔進檢校尚書左僕射山南東道節度  
使封涼國公進同中書門下平章事會愬疾甚詔  
以太子少保還東都卒年四十晟平京師市肆不  
改易愬平蔡亦如之可謂世將矣

五代

王仁裕天水人唐季兵亂仁裕年廿五尚未學夢人  
剖其腸胃以西江水滌之顧見江中砂石皆成篆  
籀及覺心開悟即慷慨自勵師授以經一覽有如

鞏昌府志

卷二四

三三

宿習於諸義理洞究精微隴西公聘爲從事屬王  
氏僭竊隴蜀限隔蜀亡入判雄武節度判官罷歸  
漢陽別墅梁王以舊知逼起之奏拜興元節度判  
官潞王將圖義舉約會梁帥帥不決仁裕曰事君  
盡忠忠君之道柰何棄之帥勃然効死乃即入奏  
聞者義之及王師倒戈帥遇害潞王下令生致仁  
裕仁裕請曰府主渝盟臣所贊也請就鼎鑊辭直  
色厲潞王壯之載以後車凡教令詔誥咸出其手  
倚馬而成至晉稍遷左司郎中時權臣用事仁裕



抗疏極言拜戶部侍郎學士明年知貢舉時論翕然稱得人仁裕曉音律晉高帝初定雅樂宴群臣於永福殿奏黃鍾仁裕聞之曰音不純肅而無和聲當有爭者起於禁中已而兩軍校鬪昇龍門外聲聞於內人以爲神仁裕在五代以文章知名有詩萬餘首號西江集

宋

劉仲武字子文秦州人熙寧中夏人謀犯天聖砦仲武力戰却之遷知河州吐番趙懷德叛仲武伏兵

鞏昌府志

卷二四

二四

道左大敗之復西寧州未幾懷德阿章降累進防禦使童貫招誘羗王邀仲武計事仲武曰王師入羗必降僕哥果約降而索一子爲質仲武即遣子錫往仲武帥師渡河挈與歸貫竊其功仲武亦不言徽宗訪得仲武功子九人悉命以官錫閤門祇候卒贈檢校少保謚曰肅

于德字子華通遠軍熟羊砦人以武勇應募隸熙帥姚古會金人入侵遣德謀之斬一將而還補進武校尉古曰能復往乎德從十六騎徑入隆德府治

執僞守姚大帥隴右驚擾德手殺數十百人衆錯愕莫敢前古械姚獻於朝欽宗問狀姚曰臣就縛時止見一夜乂耳時遂呼德爲王夜乂建炎初以勤主倍道趨闕改隸劉光世平濟南寇李昱池陽寇張遇襲敗李成授武略大夫遷前軍統領叛將張昱等圍和州太守張績求援德兵薄城下賊大潰遲明接戰斬昱俘其兵騎萬數濟自采石光世方謀討苗劉之逆迎至建康謂德曰江甯之擾諸軍不竄則盜公可伏羲夜涉大江徇國急變遂以

軍屬光世會苗劉走閩中詔德追擊德至浦城斬苗瑀擒馬柔古送行在賊劉文舜圍柳州德引兵赴之文舜請降德納而誅之自餘不戮一人遂倍道而趨妖賊王念一鼓擒之獻俘加武顯大夫榮州刺史四年收真陽數砮又遇敵於揚州北有被重鎧突陣者直前刺德德揮刀迎之即墮馬衆唬駭因麾騎乘之所殺萬計紹興初秀州水賊邵青德與戰於崇明砂青大潰他日餘黨復索戰謀言將用火牛德笑曰是古法也可一不可再此成擒

耳先命合軍持滿陳始交萬矢齊發牛皆返奔賊  
衆殲焉青自縛請命德獻俘高宗召見便殿問勞  
褒賞特異選中亮大夫同州觀察使復知蘭州徙  
屯池陽及當塗爲行營左護軍前軍統制金兵掠  
江北破滁州德越江襲奪之追擒萬戶盧孛一人  
千戶十餘人改環慶副總管六年冬劉豫遣麟猊  
入寇德分兵禦之大敗猊兵於藕塘猊挺身走麟  
在順昌亦遯除武康軍承宣使拜相州觀察使七  
年改熙河蘭廓路副總管行營左護軍都統制十

年張俊檄德就取宿州德倍道馳至蘄縣與敵遊  
騎遇遂入城偃旗卧鼓騎引去因潛師宿州夜半  
薄賊營遙謂賊曰吾與金人大小百戰雖名王隊  
長莫不糜碎爾何爲者賊遂投兵降德乘勝趨亳  
州叛將酈瓊聞德至謂都統制曰夜久未易當也  
遂遯德入亳州白張俊曰今兵威已振請乘破竹  
之勢進取東都俊難之乃班師策功第一拜興寧  
軍承宣使龍神衛都指揮使再遷侍衛親軍馬步  
軍都虞侯封隴西郡侯十一年金人遊騎及江俊

議分兵守岸德曰淮者江之蔽也請急擊之稍緩則淮非吾有矣俊猶豫德請益堅俊乃許德即渡采石俊督軍繼之夜拔和州晨迎俊入敵退保昭關又擊走之追至柘皋與金人夾河而陳諸將帥皆集惟俊後至統制田師中欲待之德怒曰事當機會復何待徑上馬兀朮以鐵騎十餘萬夾道而陣德曰賊右陣堅我當先擊之麾軍渡橋首犯其鋒敵大潰拜荆南都統制卒贈少傅

虞仲文寧遠人七歲能詩十歲能文日記千言第進

鞏昌府志

卷二四

二七

士累仕州縣以廉能稱官終翰林侍講學士卒謚文正贈特進濮國公

元

汪德臣字舜卿鞏昌鹽川人世顯子襲爵都總帥入覲憲宗所陳悉嘉納賜銀符城沔州德臣繕治室廬部署官屬數日而集進攻嘉定克敵復克宋軍進次隆慶大破之又詔德臣城益昌德臣入見乞免益昌賦稅及徭役從之甲寅雲頂呂遠將兵五千邀戰即陣擒之帝幸益昌駐北山謂德臣曰來

者言利州之功今見汝身甚小而膽甚大不知蘇  
曾薄汝城否對曰賴陛下洪福未嘗一來帝曰彼  
憚卿威名耳錫金帶俾立石紀功卒追封隴西公  
謚忠烈弟良臣子惟正惟勤世其家

